

Uunga siunnersuut: Soraarnerussutisiaqalernissamut aaqqissuussinermut peqataasussaataaneq pillugu Inatsisartut inatsisaata allanngortinneqarnissaa pillugu Inatsisartut inatsisaat nr. xx, xx. xxx 2020-meersoq
(Aningaasaqarnermut Naalakkersuisoq)

Saqqummiussissut

Siullermeerneqarnera

Naalakkersuisut sinnerlugit matumuuna soraarnerussutisiaqalernissamut aaqqissuussinermut peqataasussaataaneq pillugu Inatsisartut inatsisaata allanngortinneqarnissaa pillugu Inatsisartut inatsisaat nr. xx, xx. xxx 2020-meersussamut siunnersuut saqqummiutissavara.

Soraarnerussutisianut aaqqissuussinermut peqataasussaataanerup aaqqissuunneqarneranut tunngatillugu oqallinnermut peqataasimasut partiit, kattuffiit allallu qutsavigalugit aallarniutigissavara. Aaqqissuussinermup pitsanngorsarnissaanut siunnersuutit assigiinngitsut arlaqarlutik, oqallinneq iluaqutaasimavoq.

Immikkoortup 73-ip (UPA 2020/73) upernaq oqallisigineqarnerata nalaani oqaatigineqartut, Naalakkersuisut siunnersuut assigiinngitsut isumaliutersuutigisimavaat. Isumaliutissiissuteqarnerit inernerit maannakkut inatsisissatut siunnersuutit iluseqalerlutik naammassineqarput.

Suliassaqarfimmi matumani akiitsut akilinngitsuukkat ikinnerulernissaat aammalu maleruagassat aqukkuminarnerulernissaat, allannguutissatut siunnersuutigineqartuni siunnerfigineqarpoq. Kikkut tamarmik sapinngisamik soraarnerussutisiassaminnut akiliuteqartariaqarput, taamaalillutillu soraarninngorunik aningaasaqarnikkut atugassaqarnerulernissaminnut peqataanissaat pillugu inooqatigiinnermi oqimaaqatigiissumik piunasaqaateqarnissaq pillugu siunnerfigineqartoq, tamatumunnga peqatigitillugu aalajangiusimaannarparput.

Aalajangersarneqarpoq annikinnerpaaffissanut killiliussaq 1.000 koruuniniit 2.000 koruuninut qaffanneqassasoq. Minnerunngitsumik tamanna akissaatikinnerusunut iluaqutaasussaavoq. Akiitsunik akilinngitsuukkanik akiliisitsinissamut ukiunik sisamanik killiliineq atuutsinneqalerpoq. Tamanna tamanut ilanngullugit aamma akissaatikinnerusunut aammalu allaffissornermut iluaqutaassaaq,

Ukiumi isertitaqarfiusumi kingullermi ileqqaarnissamut pisussaaffinnut tunngasunut akiliinissamut sapaatip akunnerinik sisamanik maannakkut periarfissaqarneq atorunnaarsinneqarpoq. Siunissami sukkulluunniit akiliisoqarsinnaassaaq. Tamanna aamma ukiumut isertitaqarfiusumut, ukiup isertitaqarfiusup kingulliup siulianiittunut, atuuppoq.

Ileqqaarnissamut pisussaaffeqarneq soraarnerussutisialittut ukioqalernissaq ukiuni sisamanik sioqqullugu atorunnaassasoq siunnersuutigineqarpoq. Taamaalilluni soraarnerussutisiallit procentiliusaaq qaffallugu skattekortimik tigusaqartartut ikinnerujussuanngussapput.

Innuttaasut Norgemeersut, Savalimmiuneersut, Islandimeersut imaluunniit nunamit EU-mi ilaasortaasumeersut, ukiut marluinnaat nunatsinni maniittussaagunik, nunagisaminni soraarnerussutisianut aaqqissuussinernut akiliisarnissamut akuerineqarnissamik qinnuteqarsinnaanerit, ammaanneqarpoq.

Tamatuma saniatigut tjenestemandit pillugit inatsit malillugu atorfillit, inatsit taanna malillugu isertitamik ileqqaarnermut tunngavissaminni ilannguttarunnaartussanngorpaat. Tamanna politiini illersornissaqarfimmilu sulisunut pingaaruteqarpoq.

Inuit ataasiakkaat qaffasissorujussuarmik isertitaqartarput. Nalinginnaasumik innuttaasut taakkua soraarnerussutisiassaminnik ileqqaarnermik saniatigut allanik ileqqaagaqartartussaapput. Taamaattumik siunnerfigineqarpoq innuttaasut ukiumi isertitaqarfiusumi ataatsimi soraarnerussutisianut ileqqaakkaminnut 150.000. koruuninik akiliisimasut, pineqartup ileqqaarnissamut tunngavissai qaffasinnerusumik akiliinissamut tunngavissiigaluartut, annertunerusumik akiliinissamik pisussaaffeerutsitsisumik aalajangersakkamik atuutsitsisoqalissasoq.

Upernaakkut ataatsimiinnermi oqaatigineqartutut, Covid 19-ip ajornartorsiortitsinerata atuuttup nalorninartorsiortitsinermik malitseqarsimanera eqqarsaatigalugu, ileqqaarnissamut pisussaaffeqarnerup ukiunik marlunnik qaffanneqarnissaata kinguartinnissaa naapertuutissasoq, Naalakkersuisut isumaqarput. Sulisartunut tunngatillugu ileqqaarnissamut pisussaaffeqarneq taamaalilluni 2021-mi aamma 2022-mi suli 6 procentiussaaq, taanna namminersorlutik inuussutissarsiortunut ukiuni isertitaqarfiusuni marlunni taakkunani 4 procentiussalluni.

Tamatuma saniatigut suliffeqarfiit aalisarnermit, piniarnermit, aallaaniarnermit, savaateqarnermit aammalu kusanartulianik suliaqarnermit tunisititsisartut, tunisisut soraarnerussutisianut aaqqissuussinernut akiliutissanik akiliisarnissaat pillugu maleruagassanik aalajangersaanissamut Naalakkersuisut piginnaatinneqassasut pillugu siunnersuut, tikkuassavara. Soraarnerussutisianut aaqqissuussineq pillugu KNAPK-mut killissanut isumaqatigiissuteqarsimalluni, inatsisissatut siunnersuutip tusarniaassutigineqarneranut atatillugu SISA paasissutissiivoq. Tamanna unammilligassat annertuut, soraarnerussutisianut peqataasussaaitaanermut ingerlaavartumik akiliisarnermi paasinarsisimasut, ilaasa aaqqiiviginissaannut alloriarneruvoq annertoq aammalu annertuumik qujarunneqartoq. Tamanna Naalakkersuisuni nuannaarutigisorujussuarput. Taamaattoq killissanut isumaqatigiissummi unammilligassat tamarmik aaqqiivigineqassasut qularnarpoq, taamaattumik Naalakkersuisut suliassaqarfimmi maleruagassanik aalajangersaasinnaanissamut periarfissaqarnissamik siunnersuuteqarnissaq toqqarsimallugu.

Naggataatigut inatsisissatut siunnersuut aammalu nassuiaatit tassunga atasut innersuussutigissavakka.

Taamatut oqaaseqarlunga Naalakkersuisut sinnerlugit siunnersuut Inatsisartuni kajumittumik suliarineqartussanngorlugu tunniuppara.